

馮雲路字漸卿一字畏庵黃岡諸生年三十棄舉子
居鄂城從賀文忠講學著用書百餘卷直指汪承詔疏
薦並采其書進覽流寇逼楚以書報賀云在內以寧湖
爲止水在外以江漢爲汨羅寧湖路所談經處也城且
陷遂懷所著藏易投寧湖以死

熊甯字渭公一字立齋黃岡諸生與馮雲路同寓鄂城
破前一日別馮云大丈夫當從節義中尋實地某明日
於某樹下書熊甯公死所幸爲語母弟已而流賊至甯
端坐樹下不動怵以刃甯怒罵奮身投荷池死著有性
理格言春秋主左十三經注疏評畧大易參立齋古今
文及圖書懸象諸書